



**3**

**TOKI ADMINISTRAZIOA**

**ERRETERIAKO UDALA**

**Trafiko eta Garraio Saila**

*Iragarkia*

2015eko azaroaren 24an Udalbatzak egindako ohiko osoko bilkuran Herritarren Segurtasunean Parte Hartzeko Tokiko Kontseiluaren Araudiari behin behineko onespena eman zitzaion.

2015eko abenduaren 7-eko Gipuzkoako ALDIZKARI OFIZIALEAN argitaratutako iragarkiaren bidez 30 laneguneko epea ireki zen erreklamazioak eta iradokizunak aurkezteko.

Epe hori bukatua, ez denez inolako erreklamaziorik ez iradokizunik aurkeztu Erreglamentu hori behin betiko onartutzat ematen da eta horrela Toki Erregimeneko Oinarriak Arautzen dituen apirilaren 2ko 7/1985 Legearen 70-2 artikuluan aurreikusitakoa betetzearren, onartutako Herritarren Segurtasunean Parte Hartzeko Tokiko Kontseiluaren Araudi horren testu oso-oso argitaratzen da eta argitaratzen denetik 15 lanegunera sartuko dela indarrean adierazten da.

Eta orohar guztiek jakin dezaten eta eraginak izan ditzan argitaratzen dut. Era berean, jakinarazten da akordio honek administrazioaren bidea agortzen duela eta horren kontra administrazioarekiko auzi-errekurtoa aurkeztu ahal izango dela Euskal Autonomi Erkidegoko Auzitegi Nagusiaren aurrean, bi hilabeteko epean, iragarki hau Gipuzkoako ALDIZKARI OFIZIALEAN argitaratu eta biharamunetik zenbatzen hasita. Halaber, egoki iritzitako beste edozein errekurto aurkeztu ahal izango da.

Erreterria, 2016ko otsailaren 11.—Alkatea. (1024)

Hau da onartu den Erreglamentuaren testua:

*Erreteriako udalaren herritarren segurtasunean parte hartzeko tokiko kontseiluaren araudia.*

**ZIOEN AZALPENA**

Gizarte modernoek konplexutasunak alfer-lan bihurtzen du orokorrean delituaren aurka jarduteko ohiko polizia-erreakzio eta zigor-sistema. Ordena eta gaizkileari jazarpena egitea izan da urteetan zehar kontrol soziala izateko agintaritzaren ororen eginkizun nagusia. Zigor-sistema izaten zen oinarritzko erantzuna eta funtsean bakarrik delitu-mota oro geldiarazteko. Gaizkileari jazarpena egitea izaten zen, ikuspegi honetatik, poliziaren funtsezko helburua. Haatik, gaur egun, delituaren aurkako borrokan eraginkorra izateko, ahalik eta kasurik gehien egin behar zaio ez soilik ustezko gaizkileari, baizik eta baita biktima edo jomuga potentzialak izan daitezkeenei ere, hots, delitua jazo daitekeen inguru-sozial, ingurune guztiei. Testuinguru honetan funtsezkoa da preben-

tzioa.

Horrek esan nahi du xedea aldatu behar dela. Izan ere, lehen esaten genuen poliziak legea betearazi behar duela (betetzen ez zutenak aintzat hartuta). Orain zera esango dugu: poliziak hiritarren segurtasuna bermatu behar du (gizarte osoa aintzat hartuta) eta hori lortzeko prebentzioa, bitartekotza eta gizarte-integrazioak askozaz ere garrantzitsuagoak dira errepresioa bera baino.

Usaian polizia-mota ezberdinek (lege-betearazlea) euren gain hartu dute lege-betearazlearen eginkizuna, hori izan delarik ardatz nagusia eta gaizkilearen aurka jarduteko metodoa. Alabaina, zabaldurik dagoen uste honen lekua hartu du polizia aktiboagoak (zerbitzua emateko), zeinaren eginkizun nagusia baita deliturik eta nahasmendurik ez ematea herritarren bizi-kalitatea hobetzeko eta ordena mantentzeko. Hau da, jazarpenaren garrantzia baztertu gabe, orain hiritarren segurtasuna da muina, zeinaren hasierako puntua baita herritarrek askatasun publikorako duten eskubidea.

Gaur-gaurkoz herritarren segurtasuna hartu behar da botere publikoek gauzatzen duten ekintza integratu baten modura, herritarren lankidetzarekin batera interes publikoko erakundeen bitartez, bizikidetzak baketsua ziurtatzera bideraturik, hala nola indarkeria ezabatuz, bide eta espazio publikoak era baketsuan eta zuzen erabiltzera eta, oro har, pertsonen eta beren ondasunen aurkako delituak eta hutsegiteak egitea saihestera.

Testuinguru berri honetan, herritarrek izan behar dute segurtasuna sortzen eta bizikidetzak hobetzen dutenak; hartara, toki-mailan sustatzen diren herritarren segurtasuneko politiketan inplikatu eta parte hartu behar dute.

Bestalde, ikuspegi orokor honetan inplikatu behar dute Udaleko sail eta azpisail guztiek, bereziki gizarte-arazo espezifikoak jorratzen dituztenek, bermatzeko kalitatezko zerbitzu publikoak izango dituztela herritarrek, administrazioko instantzia guztien artean koordinatuta. Izan ere, gatazkei edo hauen prebentzioari hobeto egokitzen zaion erantzuna emateko organoa izan nahi da, horretarako ikuspuntu, interpretazio eta faktore anitzeko begirada izango duelarik.

Horrela, bada, kide anitzeko organoa izango da Kontseilua eta kontsulta eta hausnarketa izango ditu jardura nagusi. Udaleko azpisailen eta herritarren segurtasunaren arloan eskumena duten administrazio-instantzien topagune izateaz gain, udalerrian hainbat kolektiborekin eta gizarte-arazoetan jardun diren eta herritarren segurtasuneko politiketan inplikaturik edo horien eraginpean dauden gizarte-eragileen parte-hartzea ere izango du. Helburua da arloko jardura, programa eta politikak sustatzea diziplina anitzeko ikuspegitik, perspektiba soziala eta prebentziokoa txertatuta.

Administrazio-organo horren xedea izango da baterako erantzukizun soziala bultzatzea herritarren segurtasunerako politiketan, Administrazioa herritarrengandik hurbilago egon dadin eta azkarragoa eta kalitate hobekoa izan dadin.

Azken batean, organo honen bidez lortu nahi dena da herritarren segurtasunerako zerbitzua kalitatezkoa, proaktiboa eta prebentziokoa izatea, herritarren beharrei erantzuteko eta zerbitzu emateko gai dena eta gatazkan inplikaturik alderdi guztien ikuspegia biltzen duena, Udalaren jarduna egokia izan dadin gatazka konpontzeko, betiere inplikaturik alderdiekin eta arlo honetan eskumena duten instantzia administratiboekin koordinatuta.

# I. TITULUA

## KONTSEILUAREN ERAKETA, HELBURUAK ETA FUNTZIOAK

### 1. artikulua. Eraketa eta izaera.

1. Errenteriako Udalean eratzen da Herritarren Segurtasunean Parte Hartzeko Kontseilua, Euskadiko Segurtasun Publikoaren Sistema Antolatzeko ekainaren 28ko 15/2012 Legearen 9. artikuluan xedatutakoaren arabera, kontsultako eta hausnarketako kide anitzeko udal-organo gisa. Herritarren segurtasunerako udal-politiketan inplikaturata edo horien eraginpean dauden eragileen parte-hartzea izango du.

2. Kontseiluak esku hartuko du proposatzen zaizkion eta egoki deritzen gai guztietan; horretarako, proposamen, txosten edo irizpen ez-lotesleak egingo dizkio Udalari.

3. Kontseiluaren eta Udalaren arteko harremana Udaltzaingoko sailak edo azpisailak bideratuko du.

### 2. artikulua. Helburuak.

Kontseiluaren jarduera helburu hauek lortzera bideratuko da:

— Sustatzea eta aztertzea herritarren segurtasunaren arloko tokiko jarduera, programa eta politikak, diziplina anitzeko ikuspegitik eta perspektiba soziala eta prebentziokoa txertatuta.

— Sakontzea arlo honetako jardueren koordinazioan eta bultzatzea polizia-instantzien eta inplikaturatutako eragileen arteko lankidetzara.

— Baterako erantzukizun soziala bultzatzea herritarren segurtasunerako politiketan, Administrazioa herritarrengandik hurbilago egon dadin eta azkarragoa eta kalitate hobekoa izan dadin.

— Herritarren segurtasunerako zerbitzua kalitatezkoa, proaktiboa eta prebentziokoa izatea, herritarrei zerbitzura dagoena, beste instantzia batzuekin koordinatuta.

### 3. artikulua. Funtzioak.

Kontseiluak funtzio hauek izango ditu:

— Kontsultako, azterketako eta aholkularitzako zerbitzua ematea Errenteriako Udalari momentuko ezaugarrien eta egoeraren, lekuaren eta udalerraren errealitatearen arabera egokiak diren segurtasun-politikak diseinatzeko.

— Bizikidetzara nahas dezaketen egoeren jarraipena egitea (xenofobia, indarkeria matxista, eskola-indarkeria, drogak, delinkuentzia, etab.) eta diziplina anitzen ikuspegitik aztertzea konponbideak aurkitzeko, eta herritarrak arriskuan jar ditzaketen gatazkak prebenitzea.

— Herritarren segurtasunari eragiten dieten fenomenoaren bilakaerari buruzko informazioa jasotzea.

— Herritarren segurtasunerako programak eta jarduerak proposatzea edo horien diseinuan parte hartzea.

— Sektore arteko mahai izatea Udala eta bestelako erakunde publiko eta pribatuak bil daitezzen herritarren segurtasunaren inguruko edozein gai jorratzeko.

## II. TITULUA

### KONTSEILUAREN ORGANOAK

#### 4. artikulua. Osaketa.

Kontseiluak organo hauek izango ditu:

- a) Kontseiluaren Batzarra.
- b) Lehendakaritza.
- c) Idazkaritza.
- d) Lan-batzordeak.

#### 5. artikulua. Kontseiluaren Batzarra.

Kontseiluaren Batzarrak, organo nagusia den heinean, Kontseiluko lehendakaria izango du buru, eta hitza eta botoa izango duten eskubide osoko ondorengo kideek osatuko dute:

— Lehendakaria: Errenteriako alkatea izango da.

— Batzordekideak:

- a) Udaltzaingoko sail, azpisail edo zerbitzuren bateko zinegotzi-ordezkaria.
- b) Udaltzaingoko ofizial-burua edo berak eskuordetzen duen funtzionarioa.
- c) Gizarte Zerbitzuetako zuzendaria edo berak eskuordetzen duen funtzionarioa.
- d) Hezkuntza eta Gazteriako teknikaria.
- e) Kultura Aniztasuneko, Garapenerako Lankidetzako eta Giza Eskubideetako teknikaria.
- f) Berdintasuneko teknikaria edo berak eskuordetzen duen Berdintasun Kontseiluko kidea.
- g) Udal-aholkulari juridiko bat.
- h) Ertzaintzako ordezkari bat.
- i) Elkarteen edo bestelako erakundeen ordezkariak eta herritarren segurtasunaren arloko eragile inplikatuak edo ukituak (10 kide gehienez).

Erakunde eta beste eragileen ordezkariak dagokionez, besteak beste ondorengoak parte hartzera gonbidatuko dira:

— Cáritas.

— Gurutze Gorria / Cruz Roja.

— Izan Elkartea / Asociación Izan.

— SOS Arrazakeria / SOS Racismo.

— Osakidetza.

— Eskola Kontseilua / Consejo Escolar.

— Idazkaria: Udalbatzaren Idazkaria edo berak eskuordetzen duen funtzionarioa izango da. Kontseiluan parte hartuko du, ahotsarekin baina boto eskubiderik gabe, eta saioetako aktak jasoko ditu.

Kontseiluko kideen hautaketa emakume eta gizonen arteko berdintasun printzipioa errespetatuz egingo da, Emakume eta Gizonen Berdintasunari buruzko otsailaren 18ko 4/2005 Legeari jarraiki.

#### *6. artikulua. Izendapena.*

Kontseiluko kideak alkateak izendatuko ditu. Halaber, kontseilukide bakoitzaren ordezkoa ere izendatuko da.

#### *7. artikulua. Karguak berritzea.*

Kontseiluko kideen karguak, kargu teknikoak izan ezik, lau urtetik behin berrituko dira, udal-hauteskundeekin batera eta gehienez sei hilabeteko epean Udalbatza berria sortzen denetik kontatzen hasita.

#### *8. artikulua. Kargua galtzea.*

Kontseiluko kide direnek kontseilukide kargua galduko dute, honakoren bat gertatuz gero:

- a) Agintaldia amaitzea.
- b) Izendapena eragin zuten baldintzak ez gertatzea.
- c) Karguari espresuki uko egitea.
- d) Kargu publikoetan aritzeko ezgaitzen duen hutsegiteren bat egitea.

#### *9. artikulua. Bete gabeko karguak.*

Karguren bat bete gabe geratzen denean, ordezeko izateko izendaturikoarekin beteko da, betiere arestian aipaturiko baldintzak betetzen baditu. Kargu horretan egongo da ordezkatu duenaren agintaldia bukatzen den arte.

#### *10. artikulua. Lehendakaria.*

Kontseiluaren lehendakaria Udaleko alkatea izango da. Arlo horretaz arduratzen den zinegotziaren esku utzi ahal izango du lehendakaritza.

#### *11. artikulua. Lehendakariaren funtzioak.*

Hauek izango dira lehendakariaren funtzioak:

- a) Kontseiluaren zuzendaritza.
- b) Bilera bakoitzeko gai zerrenda ezartzea.
- c) Bilerak deitu eta zuzentzea.

- d) Kontseiluak harturiko erabakiak burutzen eta betetzen direla zaintzea.
- e) Kontseiluaren ohiko funtzionamendua bermatzea; eskumena izango du berdinketak izaten direnean bere kalitateko botoaren bidez erabakitzeko.

#### *12. artikulua. Idazkaria.*

Kontseiluaren idazkaria Udaltzaren idazkaria nagusia izango da, edota berak eskuordetzen duena.

#### *13. artikulua. Idazkariaren funtzioak.*

Hauek dira idazkariak bete beharreko funtzioak:

- a) Kontseiluaren Batzarraren bileretara joatea, hitzarekin baina botorik gabe.
- b) Bileretako aktak idaztea eta Kontseiluaren dokumentazioa zaintzea.
- c) Kontseiluaren Batzarraren erabakiak eta aktak ziurtatzea.
- d) Dokumentazioa eta postazko harremana tramitatu eta artxibatzea.
- e) Bileretako gai-zerrenda prestatu eta deialdiak tramitatzea.
- f) Kontseilukideentzako dokumentazioa garaiz prestatu eta bidaltzea.
- g) Kontseiluak buruturiko jardueren, egindako azterketen eta onarturiko proposamenen urteko memoria prestatzea, eta Udalean eta bestelako administrazio-instantzietan tramitatzea.
- h) Lehendakaritzak aginduta, idazkariari dagozkion funtzio orokorretako beste edozein burutzea.
- i) Ohiko eta ezohiko bileretako gai-zerrenda prestatzea, lehendakariak onar dezan.
- j) Gaiak, txostenak, proposamenak eta irizpideak prestatzea, Kontseiluan eztabaida ditzaten.
- k) Jardueren urteko txostena aurkeztea Kontseiluaren Batzarrari.

#### *14. artikulua. Lan-batzordeak.*

1. Lan-batzordeak hiru kontseilukideek osatuko dituzte gutxienez; aztertu beharreko gaien interesa izango dute eta kontseilukideen artean hautatuko dira.

2. Lan-batzordeei dagozkie:

- a) Batzorde Iraunkorarentzako proposamenak eta txostenak egitea; Lan Batzordearen zuzendaria izango da bozeramaile.

Txostenak egiteko, adituei edo elkarteei aholkularitza eta lankidetzak eskatu ahal izango zaie.

3. Azterketa sakonagoa behar duten gaietan, Batzarrak proposatuko du lan-batzordeak sortzea. Batzordeak osatzeko akordioan zehaztutako aldizkakotasunaren arabera egingo dituzte bilera.

4. Lan-batzordeetan lantzen diren gai guztien berri emango da Kontseiluaren Batzarraren bileretan.

### III. TITULUA

#### ANTOLAKETA ETA FUNTZIONAMENDUA

##### *15. artikulua. Kontseiluaren Batzarra.*

1. Batzarra da Kontseiluaren organo erabakitzailea.

2. Kontseiluaren Batzarra balioz eratzeko, kideen erdia baino bat gehiago egon beharko dira bertan. Quorum hori saio osoan zehar mantendu beharko da. Nolanahi ere, ezinbestekoa izango da lehendakaria eta idazkaria edo horien ordezkioak bertan izatea.

3. Kontseiluaren Batzarraren bilera behar bezala osatu direnean, lehen deialdian egingo dira, eta bigarren deialdian, lehenengo deialditik ordu erdira, baldin eta gutxienez kideen herena bertaratu bada.

##### *16. artikulua. Bileren aldizkakotasuna.*

1. Kontseiluaren Batzarrak ikasturtean zehar ohiko bi bilera egingo ditu gutxienez, apirilean eta urrian. Lehendakariak deialdiak egingo ditu, gutxienez zazpi egun lehenago.

2. Ezohiko bilera egingo da lehendakariaren ekimenaren bidez edo kontseilukideen laurdenak eskatuta, idatziz eta ezohiko bilera deitzeko dauden arrazoiak adierazita; eta behar bezala osaturiko Batzarrak hala erabakitzen duenean. Ezohiko bileretan ezin izango dira gai-zerrendan ez dauden gaiak eztabaidatu.

3. Kontseilukideek eskaturiko ezohiko bilera lehendakariak deituko ditu, eta ez dira hamabost egunetik gora izango bilera-eskaeraren eta bileraren artean.

##### *17. artikulua. Ekimenen memoria.*

1. Urte bakoitzaren amaieran, lan-batzorde bakoitzak urteko ekintzen memoria bat burutuko du, eta Kontseiluaren Batzarrari aurkeztuko zaizkio.

2. Kontseiluaren esku-hartzei buruzko txosten bat egingo da urtero.

##### *18. artikulua. Proposamenak eta akordioak.*

1. Kontseiluak izaera parte-hartzailea duenez, beharrezko elkarrizketak eta eztabaidak sustatuko dira, adosturiko erabakiak hartzea bideratzeko. Dena den, adostasunik izan ezean, proposamenak gehiago soilik hartuko dira.

2. Kontseiluaren Batzarraren proposamen, irizpen eta txosten guztiak helarazi beharko zaizkio Udaltzaingoari dagokion sailari edo azpisailari.

3. Gai-zerrendako gaien inguruan soilik hartu ahal izango dira akordioak, betiere eskubide osoko kideen gehiago soilak premiazkotzat jotzen ez badu beste edozein gai jorratzea.

4. Idazkariak egingo du bilera bakoitzeko akta eta jasoko ditu bertaratutakoen datuak, hausnarketaren oinarrizko alderdiak eta hartutako erabakien edukia.

5. Aktak hurrengo bileran onartuko dira. Hala ere, hartutako erabakien ziurtagiriak egin ahal izango ditu idazkariak eta horrek ez du eragotziko aurrerago akta onartzea. Akta onartu aurretik egiten diren ziurtapenenetan, berariaz jasoko da akta onartu gabe dagoela.

#### *19. artikulua. Informatzeko eginbeharra.*

Udal-zerbitzuek Kontseiluaren informazio-eskaerei erantzun beharko diete 20 eguneko epean, txosten-eskaera jasotzen denetik kontatzen hasita. Eskaera lehendakariak edo idazkariak egingo du, eskaera onartu denetik kontatzen hasita hiru eguneko epean. Informazioa kontseilukide guztiei helaraziko zaie eta hurrengo batzarrean emango da ezagutzera. Hala ere, ezohiko bilkura bat deitu ahal izango da informazio hori aztertu eta eztabaidatzeko.

#### *20. artikulua. Aurreikusi gabeko egoerak.*

Erregelamendu honetan aurreikusi ez denerako, Udalaren Araudi Organikoan eta toki-araudiaren eta administrazio-prozeduraren arloko legerian ezarritakoa beteko da.

#### *21. artikulua. Desegitea.*

Kontseilua epe mugagaberako eratu da. Udalbatzaren erabakiz soilik desegingo da.

#### *Xedapen iragankorra.*

Udaltzaingoko sailari edo azpisailari dagokio Kontseilua osatzea eta abian jartzea.

#### *Azken xedapena.*

Araudi hau indarrean sartuko da behin Errenteriako Udalaren Udalbatzak onartutakoan eta Tokiko Araubidearen alorrean indarrean dagoen legeriak ezarritako baldintzak betetakoan; betiere, testua bere osotasunean Gipuzkoako ALDIZKARI OFIZIALEAN argitaratu eta hurrengo egunean.